

A E efektonan di rekonsiliashon.

❖ For di malechor-nan pa santunan (Kol. 1:21-22)

- E asuntu ta simpel. Nos a biba hasiendo maldad i, pesei, nos a wòrdu kondená na morto etèrno. (Rom. 6:23; Rev. 21:8).
- Pa nos mes nos tabata inkapas di kambia e situashon aki, òf di paga pa nos salbashon (Salmo 49:7-8).
- Pero Dios tabatin un gran plan prepará pa nos:
 - (1) El a muri riba e krus pa paga e preis pa nos piká (Rom. 5:8)
 - (2) Dor di fe, repentimentu, i boutismo, nos ta wòrdu librá for di nos piká i ta sin mancha i sin kulpa dilanti di Dios [hustifikashon] (Rom. 5:10; Kol. 1:22)
 - (3) Dor di e trabou di e Spiritu Santu nos bida gradualmente ta wòrdu transformá i nos ta bira santu dilanti di Dios [santifikashon] (Rom. 8:1; 2 Kor. 5:17)

❖ Fundá i stabil (Kol. 1:23)

- Ya kaba nos a wòrdu hustifiká, nos ta wòrdu santifiká, pero e biahe ainda no ta kla. Nos ta kore e risiko di dual i no alkansa e meta. Esei ta e pakiko ku Pablo ta konseha nos riba tres kos (Kol. 1:23a):
 - (1) Sigui den e fe: Sea persistente, manera Pedro tabata, ora, despues di a wòrdu librá for di prizon, el a bati na e porta te ora ku esaki a wòrdu habrí p'é (Echonan 12:11-16).
 - (2) Fundá: Nos fe mester ta sólido, fundá riba e bèrdatnan ku nos a siña den e Beibel.
 - (3) Stabil: Nos mester ta no hesitante, nunca stòp di konfia den “ e speransa di e evangelio ”

B Speransa.

❖ Tresiendo speransa (Kol.1:24-25)

- Manera nos a mira, Dios Su plan pa nos slbashon ta basá riba e morto di Hesus i ta inkluí nos hustifikashon i santifikashon. Pero algu importante tabata falta: di un òf otro manera, nos mester bin sa e plan aki pa por aseptá esaki. Nos tin mester di un hende pa revelá esaki na nos..
- Esaki ta kaminda “ Dios Su atministrashon ” [Dios Su manera di ordená sirkumstansianan, pensamentunan, hendenan, etc.] ta dreña, di kual Pablo tabata un minister (Kol. 1:25).
- Pablo a regosihá den ser parti di e plan aki, ounke esaki a involve aflikshonnan, (Kol. 1:24). For di su aresto na Roma te na su morto, el a skirbi alomenos shete di e dies kuater kartanan preservá den e Tèstament Nobo.
- Pablo tabata un parti importante di Dios Su plan, i el a regosihá den dje. Nos tambe por ta parti di e plan aki dor di guia otronan na e konosementu di Kristu. Esei ta nos goso!

❖ E misterio di Dios (Kol. 1:26-27)

- Pablo ta papia di un misterio ku a wòrdu manifestá(revelá) na e Iglesia despues di e resurekshon di Kristu (Kol. 1:26). Te ku e ora ei, tabatin solamente miradanan chikitu di esaki. Pero kiko ta e misterio aki? “ Kristu den boso, e speransa di gloria ” (Kol. 1:27).
 - (1) Esaki a wòrdu planiá(formulá) promé ku e fundashon di e mundu (1 Pedro 1:20)
 - (2) Esaki a wòrdu parsialmente komuniká na e angelnan (1 Pedro 1:12)
 - (3) Un promé mirada chikitu a wòrdu duná di Adam i Eva (Gen. 3:15)
 - (4) Esaki a wòrdu revelá na e profetanan (1 Pedro 1:10-11)
 - (5) Hesus a revelá esaki promé na e Hudiunan (Mat. 15:24)
 - (6) E ora ei esaki a wòrdu revelá kompletamente na tur hende (Kol. 1:27)
- Ainda tin fasenan pa habri den e misterio aki. Awor nos ta biba den e speransa di wòrdu glorifiká. Ki un kambio! Ki un misterio! Hendenan pekaminoso ta wòrdu hustifiká, santifiká, i glorifiká dor di e sanger redemido di Hesus. E misterio aki lo sigui ta un tópiko di studio pa tur eternidat.

C E poder di e evangelio.

❖ Anunsiando e evangelio (Kol. 1:28-29)

- Kon Pablo a prediká e evangelio? E enfoka di su predikamentu tabata Kristu krusifiká (1 Korintionan 1:23). Una bes ku hende a aseptá Hesus, el a spierta i a siña nan te ora ku nan tabata perfekto (Kolosensenan 1:28-29). Kon el a hasi esaki?
 - (1) El a splika nan doktrina i práktika Kristian (2 Tesalonisensenan 2:15)
 - (2) El a spierta(avisá) nan di e konsekuensianan di rechasá e evangelio (Heb. 10:25-29)
 - (3) El a spierta nan tokante di e peligernan di siñadónan falsu (Echonan 20:29-30)
- Warda un minüt... hasi nan perfekto? I no djis un poko... “ kada hende”! (Kol. 1:28b).
- E palabra Griego tradusí “ madurá ” (teleios) ta nifiká perfekto i sin defekto. Dor di e proseso di kresementu Kristian, nos ta bira intensamente konsiente di e profundidat di Dios Su lei i di esaki su rekerimentunan. Nos meta, p'esei, ta pa ser perfekto den Kristu Hesus.